

# Era radios e televisiuns ston spargnar

Cusseglieir naziunal Martin Candinas (PCD GR) s'engascha a favur dal service public medial

DA MARTIN CABALZAR/FMR

■ **Il Cussegl federal n'è betg prompt da prender ulteriuras mesiras per stabilisar la finanziaziun dal service public medial da la SSR e dals 34 emetturs da radio e televisiun privats. Ina planisaziun da finanzas prospectiva tutgia tal ristg da l'interpresa.** Quai scriva il Cussegl federal en ina risposta ad ina interpellaziun da cusseglier naziunal *Martin Candinas* (PCD GR). Da principi stoppian la SSR ed ils emetturs privats esser abels da pudair reagir sin entradas variablas.

Tuttina è il Cussegl federal prompt da perseguitar il svilup da las entradas commercialas da la SSR. Tar la fixaziun da las taxas da radio e televisiun a partir da 2021 vegnia il Cussegl federal dentant era a risguardar ils basegns finanziais per ils differents intents d'applicaziun e perseguitar il svilup dal martgà. L'interpellaaziun vegn tractada proximamain en il cussegl.

## Martgà da medias avant grondas sfidas

Tenor l'interpellant Candinas sa chattan las medias svizras actualmain avant grondas sfidas. Per quest motiv haja il Cussegl federal era decidì l'avust 2019 d'elavurar fin la stad 2020 in pachet da mesiras per promover las medias. La finamira saja da sustegnair las medias online e las gasettas cun migliurar las kundiziuns da basa. En quest connex concept da sustegn na saja il Cussegl federal dentant betg s'exprimi davart la SSR ed ils 34 emetturs da radio e televisiun, constatescha Candinas.

I saja dentant uschea che era il volumen da finanziaziun da la SSR e da las televisiuns e radios privats che profitan dallas taxas da concessiun saja medemamain pertutgads da la digren dal martgà da reclama, ed uschea ins sajan sfurzads da realisar mesiras da spargn detg radicalas. Dapi dus onns sajan las taxas da la SSR plafonadas sin 1,2 milliardas.

Era tar ils concessiunaris privats munta la cumpart fixa a 81 milliuns, quai senza risguardar la digren da las entradas da reclama.



Cun sia interpellaziun vul cusseglier naziunal Martin Candinas s'engaschar per ina finanziaziun stabila dil service public medial. MAD

Tenor Candinas pudessia questa situaziun periclitare en il decurs dals proxims onns l'adempliment da l'incumbensa da prestaziun sur las taxas da concessiun. In tal svilup cuntraschess a l'idea d'in ferm service public medial che è vegnì sancziunà cleramain dal pievel svizzer en la votaziun davart la Bilag ils 4 da mars 2018. Premissa per pudair ademplir l'incumbensa da service public saja dentant ina finanziaziun stabila cun ina tscherta quota da taxas tant per la SSR sco per ils 34 emetturs privats da radio e televisiun. Era il Cussegl federal saja s'exprimi en ses rapport davart il service public medial ch'el quintia sustegnair era en l'avegnir la finanziaziun da la SSR e dals emetturs regionali en la dimensiun actuala.

## Betg necessari da far ulteriuras examinaziuns

Il Cussegl federal puntuescha en sia risposta ch'il cussegl d'administraziun da

la SSR saja obligà da suttametter a l'Uffizi federal UVEK il quint annual, il preventiv e la planisaziun da finanzas. Sin fundament da quests documents saja il Cussegl federal bain infurmà davart il svilup finanziaal da la SSR. En il rom da la prolungaziun da las concessiuns vegnia era la planisaziun da finanzas dals emetturs privats examinada, uschea ch'il Cussegl federal saja era infurmà davart las relaziuns economicas dils portaders locals da radio e televisiun. Ulteriuras examinaziuns na sajan dentant betg necessarias per il mument, scriva il Cussegl federal.

## Abels da finanziair sezs lur investiziuns

Tenor il Cussegl federal hajan ils portaders dals emetturs privats e regionali da radio e televisiun documentà ch'els èn abels da finanziair sezs las investiziuns necessarias ed ils manaschis. Els sajan sortids da la cumpart actuala da las taxas da

concessiun. Cun auzar cun l'entschatta da 2019 la cumpart als emetturs privats da 67,1 milliuns sin 81 milliuns hajan ins cuntanschì il maximum legal da sis pertschient.

La SSR haja gia anticipà en il budget da 2019 il plafond da 1,2 milliardas che sa resultan da las taxas da chasada e d'interpresas ed ella ha era gia resguardà commensuradamain la reducziun da las entradas da reclama. Plinavant sajan era las structures vegnidadas adattadas a las novas relaziuns. Bain vegnian questas mesiras da spargn ad avair in tschert effect retardà sin il quint da l'interpresa. Actualmain muntian las entradas betg garantidas dal martgà a rodond 20 pertschient da las entradas totalas.

Concludend sia pusiziun è il Cussegl federal da l'avis che la SSR stoppia esser abla da reagir sin fluctuaziuns da las entradas cun ina planisaziun prospectiva. Quai tutgia tar il ristg da l'interpresa.